

摘藻堂四庫全書薈要

史部

欽定四庫全書薈要

史部

舊五代史卷

九十九至
一百二

詳校官內閣侍讀_臣孫球



欽定四庫全書蒼要卷五千五百

舊五代史卷九十九

宋門下侍郎參知政事監修國史薛居正等撰

漢書第一

高祖紀上

高祖睿文聖武昭肅孝皇帝姓劉氏諱暉本名知遠及即位改今諱其先本沙陁部人也四代祖諱湍帝有天
下追尊為明元皇帝廟號文祖陵曰懿陵

五代會要湍為東漢顯宗

第八子淮陽王昞之後高祖母隴西李氏追謚明貞皇后魯祖諱

昂晉贈太保追尊為恭僖皇帝廟號德祖陵曰沛陵

五代

會要懿陵沛陵皆無陵所遙申朝拜魯祖母號國太夫人楊氏追謚恭惠

皇后祖諱侯晉贈太傅追尊為昭獻皇帝廟號翼祖陵

曰威陵祖母魯國太夫人李氏追謚為昭穆皇后皇考

諱瑱事後唐武皇帝為列校晉贈太師追尊為章聖皇

帝廟號顯祖陵曰肅陵皇妣吳國太夫人安氏追謚章

懿皇后以唐乾寧二年歲在乙卯二月四日生帝于

太原帝弱不好弄嚴重寡言及長面紫色目睛多白初
事唐明宗列于麾下明宗與梁人對柵于德勝時晉高
祖為梁人所襲馬甲連革斷帝輟騎以授之取斷革者
自跨之徐殿其後晉高祖感而壯之明宗踐阼晉高祖
為北京畱守以帝前有護援之力奏移麾下署為牙門
都校應順初晉高祖鎮常山唐明宗召赴闕會閔帝出
奔與晉高祖相遇于途遂俱入衛州泊于郵舍閔帝左
右謀害晉高祖帝密遣御士石敢袖鎚立于晉高祖後

及有變敢擁晉高祖入一室以巨木塞門敢尋死焉帝

率衆盡殺閔帝左右遂免晉高祖于難

通鑑攷異引漢高祖實錄云是

夜偵知少帝伏甲欲與從臣謀害晉高祖詐屏人對語方坐庭廡帝密遣御士石敢袖鎚立于後俄頃伏甲者起敢有勇力擁晉祖入一室以巨木塞門敢力當其鋒死之帝解佩刀遇夜晦以在地葦炬未燃者奮擊之衆謂短兵也遂散走帝乃匿身長垣下聞帝親將李洪信謂人曰石太尉死矣帝隔垣呼洪信曰大尉無恙乃踰垣出就洪信兵共護晉祖殺

建謀者以少主授王弘贊

清泰元年晉高祖復鎮河

東三年夏移鎮汶陽帝觀晉高祖舉義贊成密計經綸之始中外賴之晉高祖以帝為北京馬步軍都指揮使

及契丹以全軍赴難大破張敬達之衆于晉陽城下有
降軍千餘人晉高祖將置之于親衛帝盡殺之晉國初
建加檢校司空充侍衛馬步都指揮使權點檢隨駕六
軍諸衛事尋改陝州節度使充侍衛親軍馬步都虞候
契丹主送晉高祖至上黨指帝謂高祖曰此都軍甚操
刺無大故不可棄之晉高祖入洛委帝巡警都邑肅然
無敢犯令天福二年夏四月加檢校太保八月改許州
節度使典軍如故三年夏四月加檢校太傅冬十月授

侍衛親軍馬步軍都指揮使十一月移授宋州加檢校
太尉十二月加同平章事時帝與杜重威同制加恩帝
憤然不樂懇讓不受杜門不出者數日

通鑑知遠自以
有佐命功重威

起于外戚無大功恥與之同
制下數日杜門四表辭不受

晉高祖怒召宰相趙瑩

等議落帝兵權任歸私第瑩等以為不可乃遣端明殿
學士和凝就第宣諭帝乃承命五年三月改鄴都畱守
兼侍衛親軍馬步軍都指揮使九月奉詔赴闕晉高祖
幸其第六年七月授北京畱守河東節度使七年正月

加侍中時天下大蝗惟不入河東界六月晉高祖崩于
鄴宮少帝即位加帝檢校大師八年三月進位中書令
開運元年正月契丹南下契丹主以大軍直抵澶州遣
蕃將偉王率兵八雁門朝廷以帝為幽州道行營招討
使帝大破偉王于忻口尋奉詔起兵于土門軍至樂平
會契丹退乃還三月封太原王七月兼北面行營都統
二年四月封北平王三年五月加守太尉是月帝誅吐
渾白承福等五族凡四百人以別部王義宗統其餘衆

九月

案以下有脫文

犯塞帝親率牙兵至朔州南陽武谷大破

之

東都事畧郭進傳契丹屠安陽高祖遣進拒戰契丹敗走以功除刺史

十一月契丹主

率蕃漢大軍由易定抵鎮州杜重威等駐軍于中渡橋

以禦之十二月十日杜重威等以全軍降于契丹十七

日相州節度使張彥澤受契丹命陷京城遷少帝于開

封府帝聞之大駭分兵守境以備寇患天福十二年春

正月丁亥朔契丹主入東京癸巳晉少帝蒙塵于封禪

寺癸卯少帝北遷二月丁巳朔契丹主具漢法服御崇

元殿受朝制改晉國為大遼國大赦天下號會同十年
是月帝遣牙將王峻奉表于契丹契丹主賜詔褒美呼
帝為兒又賜木柅一蕃法貴重大臣方得此賜亦猶漢
儀賜几杖之比也王峻持柅而歸契丹望之皆避路及
峻至大原帝知契丹政亂乃議建號焉是月秦州節度
使何建以其地入于蜀戊辰河東行軍司馬張彥威與
文武將吏等以中原無主帝威望日隆羣情所屬上牋
勸進帝謙讓不允自是羣官三上牋諸軍將吏緇黃者

耆相次迫請教答允之庚午陝府屯駐奉國指揮使趙
暉侯章都頭王晏殺契丹監軍及副使劉愿暉自稱留
後契丹因授暉陝州兵馬留後侯章為本州馬步軍都
指揮使王晏為副都指揮使暉等不受命

宋史王晏傳開運末晏與本軍都校

趙暉忠衛都校侯章等戍陝州會契丹至汴遣其將劉
愿據陝恣行暴虐晏與暉等謀曰今契丹南侵天下洶
洶英雄豪傑固當乘時自奮且聞太原劉公威德遠被
人心歸服若殺愿送款河東為天下唱首則取富貴如
反掌耳暉等然之晏乃率敢死士數人夜踰城入府署
劫庫兵給其徒遲明斬愿首懸府門外衆請暉為帥章
為本城副指揮使內外巡撫使兼都
虞侯遣其子漢倫奉表晉陽開運末
辛未帝于太原宮受

冊即皇帝位制改晉開運四年為天福十二年

契丹國志云漢

主仍稱天福年號曰予未忍忘晉也

甲戌帝以晉帝舉族北遷憤惋久之

是日率親兵趨土門路邀迎晉帝至壽陽聞其已過乃
還契丹聞帝建號偽制削奪帝官爵以通事耿崇美為
潞州節度使高唐英為相州節度使崔廷勳為河陽節
度使以扼要害之地丁丑磁州賊帥梁暉據相州己卯
帝遣都將史弘肇率兵討代州平之初代州刺史王暉
叛歸契丹弘肇一鼓而拔之斬暉以徇庚辰權晉州兵

馬留後張晏洪奏軍亂殺知州副使駱從朗及括錢使
諫議大夫趙熙以城歸順時晉州留後劉在明赴東京
朝于契丹從朗知軍州事帝方遣使張晏洪辛處明等
告諭登極從朗囚之本城大將藥可儔殺從朗于理所
州民相率害趙熙三軍請晏洪為留後處明為都監辛
巳擢陝州留後趙暉權潞州留後王守恩並上表歸順
癸未澶州賊帥王瓊與其衆斷本州浮橋瓊敗死之時
契丹以族人朗悟為澶州節度使契丹性貪虐吏民苦

之瓊為水運什長乃構夏津賊帥張乙得千餘人沿河而上中夜竊發自南城殺守將絕浮航入北城朗悟據牙城以拒之數日會契丹救至瓊敗死焉契丹主初聞其變也懼甚由是大河之南無久留之意尋遣天雄軍節度使杜重威歸鎮三月丙戌朔詔河東管內自前稅外雜色徵配一切除放是日契丹主坐崇元殿行入閣之禮契丹主以舅蕭翰為宣武軍節度使辛卯權延州留後高允權遣判官李彬奏本道節度使周密為三軍

所逐以允權知留後事上表歸順未幾帝召密赴行在
壬辰丹州都指揮使高彥珣殺契丹所命刺史據城歸
命壬寅契丹主發自東京還本國是日宿于赤岡至晡
有大聲如雷起于敵帳之下契丹自黎陽濟河遂趨相
州庚戌帝以北京馬步軍都指揮使泗州防禦使檢校
太保劉崇為太原尹檢校太尉以北京馬步軍都虞候
郭從義為鄭州防禦使檢校太保以北京興捷左廂都
指揮使李洪信為陳州刺史檢校司徒以興捷右廂都

都揮使尚洪遷為單州刺史檢校司徒以北京武節左
廂都指揮使蓋萬為蔡州刺史以武節右廂都指揮使
周暉為濮州刺史以保寧都指揮使朱奉千為隨州刺
史辛亥吐渾節度使王義宗加檢校太尉以前忻州刺
史秦習為耀州團練使癸丑以北京副留守檢校司徒
白文珂為河中節度使檢校太尉夏四月己未以北京馬軍
都指揮使集州刺史劉信為滑州節度使充侍衛馬軍
都指揮使檢校太傅以北京隨使右都押衙楊邠為權

樞密使檢校太保以北京武節都指揮使雷州刺史史
弘肇為許州節度使充侍衛步軍都指揮使檢校太傅
以北京牢城都指揮使壁州刺史常思為鄧州節度使
檢校太傅兼權北京馬步軍都指揮使三城巡檢使以
河東行軍司馬張彥威為同州節度使檢校太保以蕃
漢兵馬都孔目官郭威為權樞密使檢校司徒以河東
左都押衙扈彥珂為宣徽南院司檢校司徒以右都押
衙王浩為宣徽北院使檢校司徒以兩使都孔目官王

章為權三司使檢校太保是日契丹主取相州殺留後

梁暉

宋史李穀傳潛遣河朔首豪梁暉入據安陽契丹主患之即謀北旋會有告契丹以城中虛弱者契

丹還攻安

陽陷其城暉磁州滏陽人少為盜會契丹入汴暉收集

徒黨先入磁州無所侵犯遣使送款于帝暉偵知相州頗積兵仗且無守備遂以三月二十一日夜與其徒踰垣而入殺契丹數十人奪鎧甲數萬計遂據其城契丹主先遣相州節度使高唐英率兵討之未幾契丹主至城下是月四日攻拔之遂屠其城翼日契丹主北去命

高唐英鎮之唐英閱城中遺民得男女七百人而已乾
祐中王繼弘鎮相州秦于城中得髑髏十餘萬殺人之
數從可知也庚申以石州刺史易全章為洺州團練使
以前遼州刺史安真為宿州團練使以嵐州刺史孟行
超為潁州團練使以汾州刺史武彥弘為曹州防禦使
以前憲州刺史慕容信為齊州防禦使以遼州刺史薛
瓊為亳州防禦使以沁州刺史李漢韜為汝州防禦使
癸亥冊魏國夫人李氏為皇后甲子以皇長子承訓為左

衛上將軍第二子承祐為左衛大將軍第三子承勳為
右衛大將軍皇女彭城郡君宋氏封永寧公主皇姪承
贊為右衛上將軍以河東節度判官令蘇逢吉為中書侍
郎同平章事集賢殿大學士以河東觀察判官蘇禹珪
為中書侍郎同平章事升府州為節鎮加永安軍額以
振武節度使府州團練使折從阮為永安軍節度使行
府州刺史檢校太尉以北京隨使左都押衙劉銖為河
陽節度使以河東度支使韓祚為左諫議大夫充樞密直

學士乙丑遣史弘肇率兵一萬人趨潞州丙寅以權知潞州軍州事左驍衛大將軍王守恩為潞州節度使檢校太保以權點檢延州軍州事高允權為延州節度使檢校太保以奇嵐軍使鄭謙為忻州刺史遙領應州節度使克忻代二州義軍都部署丁卯以河東都巡館驛沿河巡檢使閻萬進為嵐州刺史領朔州節度使克嵐憲二州義軍都制置使戊辰權河陽留後武行德以城來歸初契丹主將發東京船載武庫兵仗自汴浮河欲置之

于北地遣奉國都虞候武行德部送與軍士千餘人并家屬俱行至河陰軍亂奪兵仗殺契丹監吏衆推行德為帥與河陰屯駐軍士合乃自汜水抵河陽河陽偽命節度使崔廷勳率兵拒之兵敗行德等追躡之廷勳棄

城而遁行德因據其城

隆平集武行德傳行德陷于契丹偽請自效因遣送將校數十

人護所取尚方鎧甲還契丹至河陰行德謂衆曰我與若等能為邊地鬼耶衆素伏其威名皆曰惟命遂攻孟州走其節度使崔廷勳悉以府庫分諸校而權顧州事遣其弟行友詣太原勸進 偽命西京留

守劉晞棄洛城南走許州遂奔東京洛巡檢使方太自

署知畱守事未幾太為武行德所害是日蕃將耿崇美屯澤州史弘肇遣先鋒將馬誨率兵擊之崇美退保懷州崔廷勳以契丹衆攻武行德于河陽行德出戰為廷勳所敗汴州蕭翰遣蕃將高牟翰將兵援送劉晞復歸于洛牟翰至殺前澶州節度使潘環于洛陽辛未以河陽都部署武行德為河陽節度使檢校太尉充一行馬步軍都部署甲戌潞州節度使王守恩加檢校太尉以前棣州刺史慕容彥超為澶州節度使檢校太保丙子

契丹主耶律德光卒于鎮州之藥城趙延壽于鎮州自稱
權知國事辛巳陝州節度使趙暉加檢校太尉華州節
度使兼陝州馬步軍都指揮使侯章加檢校太傅以陝
府馬步軍副都指揮使兼絳州防禦使王晏為晉州節
度使檢校太傅以丹州都指揮使權知軍州事高彥珣
為丹州刺史

隆平集王晏傳云漢祖威名未振
而晏等歸之甚喜卽授以節度使

舊五代史卷九十九

舊五代史卷九十九攷證

漢高祖紀一帝大破偉王于忻口。○案漢祖破偉王是書作開運元年正月歐陽史漢本紀作三年五月晉本紀又載開運元年正月辛丑劉知遠及契丹偉王戰于秀容敗之兩紀年月互異應以是書為據

三年五月加守太尉是月帝誅吐渾白承福等五族
案歐陽史作八月殺吐渾白承福等族

壬寅契丹主發自東京還本國。○案遼史太宗紀作四

月丙辰朔發自汴州與是書異歐陽史及通鑑俱從是書作壬寅

殺契丹數十人○案契丹國志作殺遼兵數百

丙子契丹主耶律德光卒于鎮之欒城○案遼史太宗紀四月丁丑崩于欒城與是書異歐陽史及通鑑俱從是書作丙子

朗鄂舊作朗五今改

舊五代史卷九十九攷證

欽定四庫全書薈要卷五千五百一

舊五代史卷一百

宋門下侍郎參知政事監修國史薛居正等撰

漢書第二

高祖紀下

天福十二年夏五月乙酉朔契丹所署大丞相政事令
東京畱守燕王趙延壽為永康王烏裕所繫既而烏裕
召蕃漢臣寮于鎮州牙署矯戎王遺詔命烏裕嗣位于

是發哀成服辛卯詔取五月十二日車駕南幸甲午以

判太原府事劉崇為北京畱守命皇子承訓武德使李

暉為大內巡檢丙申帝發河東取陰地關路幸東京時星

官言太歲在午不利南巡故路出陰地丁酉史弘肇奏

澤州刺史翟令竒以郡來降

宋史李萬超傳史弘肇路徑澤州刺史翟令竒堅壁

拒命萬超馳至城下諭之曰今契丹北遁天下無主并

州劉公仗大義定中土所向風靡後服者族盍早圖之

令竒乃開門迎納

弘肇即畱萬超權州事

是日契丹所署汴州節度使蕭翰

迎郇國公李從益至東京請從益知南朝軍國事己亥

蕭翰發離東京北去乙巳契丹永康王烏裕自鎮州還
蕃行次定州以定州節度使耶律忠為定州節度使孫
方簡為雲州節度使方簡不受命遂歸狼山戊申車駕
至絳州本州刺史李從朗以郡降初契丹遣偏校成霸
卿曹可璠等守其郡帝建義之始不時歸命及車駕至
帝耀兵于城下不令攻擊從朗等遂降六月乙卯契丹
河中節度使趙贊起復河中節度使是日契丹右僕射
兼中書侍郎平章事張礪卒于鎮州丙辰車駕至洛兩

京文武百寮自新安相次奉迎郇國公李從益唐明宗
淑妃王氏皆賜死于東京甲子車駕至東京丙寅以漢
州就糧歸捷指揮使張建雄為濮州刺史以金州守禦
指揮使康彥環為金州防禦使建雄彥環皆因亂害本
州刺史自知州事故有是命以北京知進奏王從璋為
內客省使戊辰制大赦天下應天福十二年六月十五
日昧爽已前天下見禁罪人已結正未結正已發
覺未發覺除十惡五逆外罪無輕重咸赦除之諸州

去年殘稅並放東西京一百里內放今年夏稅一百里外及京城今年屋稅並放一半契丹所授職任不議改更諸貶降官未量移與量移已量移者與敘錄徒流人並放還應係欠省錢家業抵當外並放宜以國號為大漢年號依舊稱天福云已已詔青州襄州安州復為節鎮曹陳二州依舊為郡壬申北京畱守劉崇加同平章事以中書舍人劉繼儒為宗正卿翰林學士承旨尚書兵部侍郎張允落職守本官以尚書左丞張昭為吏部

侍郎以左散騎常侍邊歸讜為禮部侍郎以左散騎常侍王仁裕為戶部侍郎充翰林學士承旨以右諫議大夫張沆為左散騎常侍充翰林學士以戶部侍郎李式為光祿卿以翰林學士尚書禮部侍郎邊光範為衛尉卿甲戌詔文武臣僚每遇內殿起居輪次上封事丁丑以湖南節度使馬希範卒輟視朝三日是月契丹所命相州節度使高唐英為屯駐指揮使王繼弘楚暉所殺秋七月己丑以御史中丞趙上交為太僕卿以戶部侍

郎邊蔚為御史中丞甲午武安軍節度副使水陸諸軍
副都指揮使判內外諸司江南西道觀察等使檢校太
尉馬希廣可檢校太師兼中書令行潭州大都督天策
上將軍充武安軍節度湖南管内觀察使江南諸道都
統封楚王丙申以鄴都畱守天雄軍節度使檢校太師
守太傅兼中書令衛國公杜重威為宋州節度使加守
太尉以宋州節度使檢校太師兼中書令高行周為鄴都
畱守加守太傅以鄆州節度使檢校太師兼侍中李守

貞為河中節度使加兼中書令以河中節度使檢校太

尉趙贊為晉昌軍節度使

宋史趙贊傳贊懼漢疑已潛遣親吏趙僊奉表歸蜀判官

李恕者趙延壽賓佐深所委賴至家事亦參之及贊出鎮從為上介至是恕語贊曰燕王入遼非所願也漢方建國必務懷柔公若泥首歸朝必保富貴狼狽入蜀理難萬全儻若不容後悔無及公能聽納請先入朝為公申理贊即遣恕詣闕漢祖見恕問贊何以附蜀恕曰贊家在燕薊身受契丹之命自懷憂恐謂陛下終不能容招引西軍蓋圖苟免臣意國家甫定務安臣民所以令臣乞哀求覲漢祖曰贊之父子亦吾人也事契丹出于不幸今聞延壽落于陷穽吾忍不容贊耶恕未還贊已離鎮入朝即命為左驍衛將軍

以晉昌軍

節度使張彥超為鄜州節度使加檢校太師庚子以徐

州節度使檢校太師同平章事岐國公符彥卿為兗州
節度使加兼侍中以鄧州節度使檢校太師王周為徐
州節度使加同平章事以許州節度使檢校太保劉重
進為鄧州節度使加檢校太傅以兗州節度使檢校太
師兼侍中安審琦為襄州節度使檢校太師莒國公李
從敏為西京畱守加同平章事以鳳翔節度使檢校太
師同平章事候益依前鳳翔節度使加兼侍中辛丑故
守司空兼門下侍郎平章事譙國公劉昫贈太保甲辰

華州節度使侯章同州節度使張彥威涇州節度使史威
並加檢校太尉以晉昌軍節度使檢校太保劉珠為青
州節度使加檢校太尉同平章事以河中節度使檢校
太尉白文珂為鄆州節度使加同平章事以青州節度
使楊承信為安州節度使加檢校太傅滑州節度使兼
侍衛馬軍都指揮使劉信許州節度使兼侍衛步軍都
指揮使史弘肇並加檢校太尉庚戌以司天監任廷浩
為殿中監以司天少監杜昇為司天監是月契丹永康

王烏裕因祖母舒嚕氏于木葉山閏月辛酉以左衛上
將軍皇甫立為太子太師致仕乙丑禁造契丹樣鞍轡
器械服裝故開封尹桑維翰贈尚書令故西京畱守景
延廣贈中書令以前衛尉卿薛仁謙為司農卿丙寅唐
故樞密使郭崇韜贈中書令故河中節度使安重誨贈
尚書令故華州節度使毛璋贈侍中故汴州節度使朱
守殷贈中書令丁卯故青州節度使楊光遠贈尚書令
追封齊王仍令所司追謚立碑唐故河中節度使西平

王朱友謙追封魏王故樞密使馮贇贈中書令故河陽節度使判六軍康義誠贈中書令故西京畱守京兆尹王思同故邠州節度使藥彥稠故襄州節度使安重進故鎮州節度使安重榮並贈侍中庚午以前延州畱後薛可言為宣徽北院使以監察御史王度為樞密直學士新授宋州節度使杜重威據鄴都叛詔削奪重威官爵貶為庶人以高行周為行營都部署率兵進討辛未以權樞密使楊邠為樞密使加檢校太傅以權樞密副

使郭威為副樞密使加檢校太保以權三司使王章為
三司使加檢校太傅壬申故晉昌軍節度使趙在禮贈
中書令故曹州節度使石贇贈侍中故滑州節度使皇
甫遇贈中書令故同州節度使劉繼勳故貝州節度使
梁漢璋皆贈太尉故宣徽使孟承誨贈太保丁丑有彗
出于張旬日而滅己卯陝州節度使趙暉加階爵晉州
節度使王晏加檢校太尉河陽節度使武行德加階爵
延州節度使高允權加檢校太尉鄧州節度使常思加

檢校太尉移鎮潞州庚辰追尊六廟以太祖高皇帝世
祖光武皇帝為不祧之廟高曾已下四廟追尊謚號已
載于前矣是日權太常卿張昭上六廟樂章舞名太祖
高皇帝室酌獻請依舊奏武德之舞世祖光皇帝室酌
獻請依舊奏大武之舞文祖明元皇帝室酌獻請奏靈
長之舞德祖恭僖皇帝室酌獻請奏積善之舞翼祖昭
獻皇帝室酌獻請奏顯仁之舞顯祖章聖皇帝室酌獻
請奏章慶之舞其六廟歌詞文多不錄八月壬午朔鎮

州駐屯護聖左廂都指揮使白再筠等逐契丹所命節度使滿達復其城滿達與河陽節度使崔廷勳洛京留守劉晞並奔定州馳驛以聞庚寅以洺州團練使薛懷讓為邢州節度使辛卯詔恒州復為鎮州順國軍復為成德軍乙未以護聖左廂都指揮使恩州團練使白再筠為鎮州留後丙申詔天下凡關賊盜不計贓物多少案驗不虛並處死以兩浙節度使守太師兼中書令吳越國王錢弘佐薨廢朝三日丙午以吐渾府節度使檢

校太尉王義宗為沁州刺史依前吐渾節度使已酉以
刑部尚書竇貞固為吏部尚書是日薛懷讓奏收復邢
州殺偽命節度副使知州事劉鐸初懷讓為洛州防禦
使契丹滿達發健步督洛州糧運懷讓殺之以聞帝遣
郭從義與懷讓攻取邢州蕃將楊衮來援鐸懷讓拒之
不勝退保洛州敵騎掠其部民大被其苦會鎮州逐滿
達揚衮收兵而退鐸乃上表請命懷讓乘其無備遣人
給鐸云奉詔襲契丹請置頓于郡鐸開門迎之卽為懷

讓所害時人寃之鐸初受契丹命為邢州都指揮使及永康王以高奉明為節度使滿達署鐸為邢州副使兼都指揮使帝至東京奉明歸鎮州令鐸知邢州事至是遇害庚戌文武百寮上表請以二月四日降誕日為聖壽節從之前晉昌軍節度副使李肅可左驍衛上將軍致仕是月遣使諸道和市戰馬九月甲子宰臣蘓逢吉兼戶部尚書蘇禹珪兼刑部尚書丁卯以吏部侍郎權判太常卿事張昭為太常卿戊辰故易州刺史郭璘贈

太傅甲戌宰臣蘇逢吉加左僕射監修國史蘇禹珪加右僕射集賢殿大學士以吏部尚書竇貞固為守司空

兼門下侍郎平章事弘文館大學士

宋史竇貞固傳初帝與貞固同事晉

祖甚相得時蘇逢吉蘇禹珪自霸府僚佐驟居相位思得舊臣冠首以貞固持重寡言有時望乃拜司空門下侍郎平章事以翰林學士行中書舍人李濤為中書侍郎兼

戶部尚書平章事

宋史李濤傳杜重威據鄴叛高祖命高行周慕容彥超討之二帥不協濤

密疏親征高祖覽奏以濤堪任宰輔即拜中書侍郎兼戶部侍郎平章事

是日權太常卿張

昭上疏奏改一代樂名戊寅詔以杜重威叛命取今月

二十九日暫幸澶魏已卯以前樞密使李崧為太子太傅以前左僕射和凝為太子太保庚辰車駕發京師冬十月癸未以太子太保李璘為司徒以太子太傅盧文紀為太子太師以前磁州刺史李穀為左散騎常侍

宋史

李穀傳舊制罷外郡歸本官至是進秩獎之也

甲申車駕次韋城詔河北諸州

見禁罪人自十月五日昧爽以前常赦所不原者咸赦除之壬辰日有黑子如鷄卵丙申以相州留後王繼弘為相州節度使加檢校太傅至鄴都城下丙午詔都部

署高行周督衆攻城帝登高阜以觀之時衆議未欲攻
擊副部署慕容彥超堅請攻之是日王師傷夷者萬餘
人不克而退十一月壬子雨木冰癸丑日南至從官稱
賀于行宮己未湖南奏荆南節度使高從誨叛辛酉雨
木冰壬申杜重威上表請命癸酉雨木冰丁丑杜重威
素服出降待罪于宮門詔釋其罪鄴都畱守天雄軍節
度使高行周加守太尉封臨清王以杜重威為檢校太
師守太傅兼中書令楚國公己卯以許州節度使兼侍

衛步軍都指揮使史弘肇為宋州節度使同平章事充
侍衛親軍馬步軍都指揮使以滑州節度使兼侍衛馬
軍都指揮使劉信為許州節度使同平章事充侍衛親
軍馬步軍副都指揮使以澶州節度使慕容彥超為鄆
州節度使同平章事以前定州節度使李殷為貝州節
度使以鄭州防禦使郭從義為澶州節度使十二月辛
巳朔以護聖左廂都指揮使岳州防禦使李洪信為遂
州節度使充侍衛步軍都指揮使以護聖右廂都指揮

使永州防禦使尚洪遷為夔州節度使充侍衛步軍都

指揮使丙戌車駕發鄴都歸京癸巳至自鄴都甲午以

皇子開封尹承訓薨廢朝三日追封魏王丁酉帝舉哀

于太平宮庚子司徒李璘薨辛丑以前鄜州節度使郭

謹為滑州節度使加檢校太尉戊申宿州奏部民餓死

者八百六十有七人乾祐元年正月辛亥朔帝不受朝

賀乙卯制大赦天下改天福十三年為乾祐元年自正

月五日昧爽巳前犯罪人除十惡五逆外罪無輕重咸

赦除之己未改御名為曷辛酉詔諸道行軍副使兩司
判官並不得奏薦帶使相節度使許奏掌書記支使節
度推官不帶使相節度使只許奏掌書記節度推官其
防禦團練判官軍事判官等廳奏所薦州縣官帶使相
節度使許薦三人不帶使相二人防禦團練刺史一人
云以前鄧州節度使燕國公馮道為守太師進封齊國
公甲子帝不豫庚午以前宗正卿石光贊為太子賓客
以太僕卿趙上交為秘書監丁丑故尚書左丞韓作贈

司徒二十七日丁丑帝崩于萬歲殿時年五十四祕不

發喪庚辰太傅杜重威伏誅

拜丹國志云漢主召蘇逢吉楊邠史弘肇入受顧命

曰承祐幼弱後事託在卿輩又曰善防杜重威是日殂逢吉等祕不發喪下詔稱重威父子因朕小疾謗議搖衆皆斬之磔死于市市人爭啖其肉二月辛巳朔內降遺制皇子周王承

祐可于柩前卽皇帝位是日發哀其年三月太常卿張

昭上謚曰睿文聖武昭肅孝皇帝廟號高祖十一月壬

申葬于睿陵宰臣蘇禹珪撰謚冊哀冊文云

五代史補高祖嘗在

晉祖麾下晉祖既起太原因高祖遂有天下先是豫章有僧號上藍者精于術數自唐末著識云石榴花發石

樞開議者以石樞則晉漢之謂也再
言石樞者明享祿俱不過二世矣

史臣曰在昔皇天降禍諸夏無君漢高祖肇起并汾遄
臨汴洛乘虛而取神器因亂而有帝圖雖曰人謀諒由
天啟然帝昔隸戎蕃素虧物望洎登宸極未厭人心徒
矜拯溺之功莫契來蘇之望良以急于止殺不暇崇仁
燕薊降師既連營而受戮鄴臺叛帥因閉壘以偷生蓋
撫御以乖方俾征伐之不息及回鑿輅尋墮烏號故雖
有應運之名而未覩為君之德也

舊五代史卷一百

舊五代史卷一百考證

漢高祖紀下矯戎王遺詔命烏裕嗣位。○案遼史世宗紀作四月戊寅即皇帝位。歐陽史通鑑契丹國志俱從是書作五月與遼史異。

乙巳契丹永康王烏裕自鎮州還蕃行次定州。○案遼史作甲申次定州與是書異。

契丹河中節度使趙贊起復河中節度使。○案遼史世宗紀天祿二年十月壬午南京留守魏王趙延壽薨。

攷遼天祿二年即漢乾祐二年此時天福十二年延壽尚未死也此必因延壽為永康王所鎖而漢人傳其已死遂起復其子贊以絕其北向之心耳

新授宋州節度使杜重威據鄴都叛詔削奪重威官爵貶為庶人。案通鑑杜重威之叛在七年至閏月庚午乃削奪官爵五代春秋歐陽史作閏七月杜重威拒命與通鑑異

懷讓遣人詔鐸云奉詔襲契丹請置頓于郡。案宋史

薛懷讓傳懷讓遣人詔鐸云我奉詔為邢州帥据是書則懷讓實給鐸奉詔襲契丹以庚寅授邢州節度使非給之也特託言置頓于郡耳

丙申至鄴都城下○案通鑑作戊戌至鄴都城下與是書異

甲午以皇子開封尹承訓薨廢朝三日追封魏王○案通鑑辛卯皇子開封尹承訓卒乙未追立為魏王與是書紀日互異

烏裕舊作几欲今改○舒嚕舊作述律今改○滿達舊
作麻答今改

舊五代史卷一百攷證

欽定四庫全書薈要卷五千五百二

舊五代史卷一百一

宋門下侍郎參知政事監修國史薛居正等撰

漢書第三

隱帝紀上

隱皇帝諱承祐高祖第二子也母曰李太后以唐長興二年歲在辛卯三月七日生帝于鄴都之舊第高祖鎮太原署節院使累官至檢校尚書右僕射國初授左衛

大將軍檢校司空遷大內都點檢檢校太保乾祐元年正月二十七日高祖崩祕不發喪二月辛巳授特進檢校太尉同平章事封周王宣制畢有頃召文武百寮赴萬歲殿內降大行皇帝遺制云周王承祐可于柩前即皇帝位服紀日月一依舊制是日內外發哀成服初高祖欲改年號中書門下進擬乾和二字高祖改為乾祐至是與御名相符甲申羣臣上表請聽政詔答不允凡四上表從之丁亥帝于萬歲殿門東廡下見羣臣尊母

后為皇太后己丑徐州節度使王周卒庚寅以前晉州
留後劉在明為鎮州留後幽州馬步軍都部署加檢校
太尉是日工部尚書龍敏卒壬辰右衛大將軍王景崇
奏于大散關大敗蜀軍俘斬三千人初契丹犯京師侯
益趙贊皆受其命節制岐蒲聞高祖入洛頗懷反側朝
廷移贊于京兆侯益與贊皆求援于蜀蜀遣何建率軍
出大散關以應之至是景崇糾合岐雍邠涇之師以破
之癸巳制大赦天下自乾祐元年二月十三日昧爽已

前所犯罪人已結正未結正已發覺未發覺常赦所不
原者咸赦除之中外文武臣寮並與加恩馬步將士各
賜優給唐晉兩朝求訪子孫立為二王後云丙午鳳翔
巡檢使王景崇遣人送所獲偽蜀將校軍士四百三十
八人至闕下詔釋之仍各賜衣服以兵部侍郎張允為
吏部侍郎以工部侍郎司徒詡為禮部侍郎丁未以光
祿卿李式為尚書右丞以禮部侍郎邊歸謹為刑部侍
郎以刑部侍郎盧價為兵部侍郎三月甲寅帝始御廣

政殿羣臣起居殿中少監胡崧上言請禁斫伐桑棗為
薪城門所由專加捉搦從之丙辰鄴都畱守太尉中書
令臨清王高行周進封鄴王北京畱守檢校太尉同平
章事劉崇加宋州節度使兼侍衛親軍馬步軍都指揮
使檢校太尉同平章事史弘肇並加檢校太師兼侍中
前邢州節度使安叔千以太子太師致仕戊午以右諫
議大夫于德辰為兵部侍郎庚申河中節度使檢校太
師兼中書令李守貞加守太傅進封魯國公襄州節度

使檢校太師兼中書令號國公安審琦加守太保進封
齊國公兗州節度使檢校太師兼侍中岐國公符彥卿
加兼中書令進封魏國公許州節度使兼侍衛親軍副
都指揮使檢校太尉同平章事劉信加檢校太師壬戌
以宰臣竇貞固為山陵使吏部侍郎段希堯為副使太
常卿張昭為禮儀史兵部侍郎盧價為鹵簿使御史中
丞邊蔚為儀仗使丙寅以前鳳翔節度使兼西南面兵
馬都部署檢校太師兼侍中侯益為開封尹加兼中書

令宋史侯益傳益率數十騎奔入朝隱帝遣侍臣問益連結蜀軍之由益對曰臣欲誘之出關掩殺之且隱帝笑之益厚賂史弘肇輩言王景崇之橫恣諸雅貴深庇護之乃授以開封尹兼中書令重

西京留守

檢校太師平章事莒國公李從敏夏州節度使校檢太師同平章事李彛殷並加兼侍中青州節度使檢校太尉同平章事劉銖鄆州節度使檢校太尉同平章事慕容彥超並加檢校太師詔改廣晉府為大名府晉昌軍為承興軍戊辰靈州節度使檢校太師同平章事馮暉加兼侍中河陽節度使武行德滄州節度使王景華州

節度使侯章晉州節度使王晏並依前檢校太尉加同
平章事庚午涇州節度使史懿潞州節度使常思同州
節度使張彥威延州節度使高允權並依前檢校太尉
加同平章事澶州節度使郭從義邢州節度使薛懷讓
並自檢校太傅加檢校太尉以前奉國右廂都指揮使
王饒為鄜州畱後甲戌以邠州節度使檢校太尉同平
章事王守恩為永興軍節度使加檢校太師以滑州節
度使檢校太尉郭謹為邠州節度使以前鎮州畱後檢

校太傅白再筠為滑州節度使加檢校太尉以陝州節度使檢校太尉同平章事趙暉為鳳翔節度使以前河中節度使檢校太尉同平章事白文珂為陝州節度使殿中監任延浩配流鄜州坐為劉崇所奏故也丙子鄧州節度使劉重進相州節度使王繼弘安州節度使楊信並自檢校太傅加檢校太尉以鎮州留後兼幽州一行馬步軍都部署檢校太傅劉在明為鎮州節度使加檢校太師部署如故貝州節度使檢校太傅李殷加檢

校太尉定州節度使檢校太尉孫方簡府州節度使檢
校太傅折從阮並加檢校太師丁丑中書侍郎兼戶部
尚書平章事李濤罷免勒歸私第時蘇逢吉等在中書
樞密使楊邠副樞密使郭威等權勢甚盛中書每有除
授多為邠等所抑濤不平之因上疏請出邠等以藩鎮
授之樞密之務宜委逢吉禹珪疏入邠等知之乃見太
后泣訴其事太后怒濤由是獲譴先是中書厨釜鳴者
數四未幾濤罷免西道諸州奏河中李守貞謀叛發兵

據潼關夏四月辛巳陝州兵馬監押王玉奏收復潼關
定州孫方簡奏三月二十七日契丹棄定州遁去壬午
以樞密使楊紉為中書侍郎兼吏部尚書平章事使如
故以副樞密使郭威為樞密使加檢校太尉三司使王
章加檢校太尉同平章事鄧州刺史尹寶奏荆南起兵
在境上欲攻城是日以澶州節度使郭從義為永興軍
一行兵馬都部署時供奉官時知化王益自鳳翔部署
前永興節度使趙贊部下牙兵趙思綰等三百餘人赴

闕三月二十四日行次永興思綰等作亂突入府城據城以叛故命從義帥師以討之甲申王景崇奏趙思綰叛見起兵攻討丁亥幸道宮佛寺禱雨戊子東南面兵馬都元帥兩浙節度使檢校太師兼中書令吳越國王錢弘俶加諸道兵馬都元帥天策上將軍湖南節度使檢校太師兼中書令楚王馬希廣加守中書令以陝州節度使白文珂為河中府城下一行都部署庚寅宰臣竇貞固蘇逢吉蘇禹珪並進封開國公辛卯削奪李守

貞在身官爵甲午以翰林學士承旨戶部侍郎王仁裕
為戶部尚書以翰林學士左散騎常侍張沆為工部尚
書以翰林學士中書舍人范質為戶部侍郎以樞密直
學士尚書比部員外郎王度為祠部郎中並依前充職
以待衛步軍都指揮使尚洪遷充西南面行營都虞候
以客省使王峻為西南面行營兵馬都監戍戍以宣徽
南院使扈彥珂為左金吾上將軍庚子以左金吾大將
軍充兩街使檢校太傅劉承贊為徐州節度使甲辰以

宣徽北院使薛可言為右金吾上將軍以皇城使李暉

為宣徽南院使乙巳定州節度使孫方簡奏復入于本

州初方簡為狼山寨主叛晉歸契丹及契丹降中渡之

師乃以方簡為定州節度使契丹主死永康王嗣位即

以蕃將耶律忠代之移方簡為雲州節度使方簡不受

命遂歸狼山高祖至闕方簡歸款復以中山命之是歲

三月二十七日契丹棄定州隳城壁焚室廬盡驅人民

入蕃惟餘空城瓦礫而已至是方簡自狼山回保定州

是月河決原武縣河北諸州旱徐州餓死民九百三十有七
五月己酉朔國子監奏周禮儀禮公羊穀梁傳四經未
有印板欲集學官考校雕造從之己未回鶻遣使朝貢
丁卯前翰林學士徐臺符自幽州逃歸乙亥河決滑州
魚池六月戊寅朔日有食之庚辰以內客省使王峻為
宣徽北院使依前永興城下兵馬都監以冀州牢城
指揮使張廷翰為冀州刺史時廷翰殺本州刺史何行
通自知州事故有是命甲申以皇弟右衛大將軍勲為

興元節度使檢校太尉同平章事豐州節度使郭勳加
檢校太師辛卯永興兵馬都部署郭從義奏得王景崇
報有兵自隴州來欲投河中追襲至廊城荆南節度使
高從誨上表歸命從誨嘗拒朝命至是方遣牙將劉扶
詣闕請罪丙申鎮州奏節度使劉在明卒戊戌以河陽
節度使武行德為鎮州節度使以宣徽南院使李暉為
河陽節度使以相州節度使王繼弘為貝州節度使壬
寅荆南高從誨入貢謝恩釋罪丙午以前永興軍節度

使王守恩為西京畱守是月河北旱青州蝗秋七月戊申朔相州節度使王繼弘殺節度叛官張易以訛言聞是時法尚深刻藩郡凡奏刑殺不究其實即順其請故當時從事鮮賓客之禮重足累跡而事之猶不能免其禍焉壬子以工部侍郎李穀充西南面行營都轉運使乙卯禮儀使張昭上高祖廟尊號獻舞名并歌辭舞曲請以觀德為名歌辭不錄丙辰以久旱幸道宮佛寺禱雨是日大澍開封言陽武雍丘襄邑三縣蝗為鸛鶴聚

食詔禁捕鸚鵡庚申樞密使郭威加同平章事辛酉滄
州上言自今年七月後幽州界投來人口凡五千一百
四十七北土饑故也乙丑以宣徽北院使王峻為宣徽
南院使以內客省使吳虔裕為宣徽北院使戊辰以遂
州節度使兼侍衛親軍馬軍都指揮使李洪信為澶州
節度使以澶州節度使郭從義為永興軍節度使兼行
營都部署庚午故兵部尚書李懌贈尚書左僕射鎮州
奏準詔處斬節度使張鵬訖鵬以一言之失為鄴帥高

行周所奏故命誅之乙亥新授鳳翔節度使趙暉奏與
八作使王繼濤領部下兵同赴鳳翔時王景崇拒命故
也八月己卯以華州節度使侯章為邠州節度使以左
金吾上將軍扈彥珂為華州節度使壬午命樞密使郭
威赴河中府軍前詔河府永興鳳翔行營諸軍一粟威
節制時李守貞王景崇趙思綰連衙作叛朝廷雖命白
文珂常思攻討河中物議以二帥非守貞之敵中外憂
之及是命之降人情大愜癸巳以奉國左廂都指揮使

閩州防禦使劉詞為夔州節度使充侍衛步軍都指揮使兼河中行營都虞侯以護聖左廂都指揮使岳州防禦使李洪義為遂州節度使充侍衛馬軍都指揮使乙未兩浙節度使檢校太尉兼侍中吳越國王錢弘俶加檢校太師兼中書令東南面兵馬都元帥弘俶故吳越王元瓘之子也先是其兄弘侖襲父位尋為部下所廢以弘俶代之故特加是命焉新授鳳翔節度使趙暉奏部署兵士赴鳳翔城下癸卯郭威奏今月二十三日大

軍已抵河府賊城至二十六日開長連塹畢築長連城
次九月戊申侯益部曲王守筠自鳳翔來奔言益家屬
盡為王景崇所害壬子郭威奏破河府賊軍于城下甲
寅故夔州節度使兼侍衛步軍都指揮使尚洪遷贈太
尉乙丑雪書不時也戊辰鳳翔都部署趙暉奏大破川
軍于大散關殺三千餘人其餘棄甲而遁隆平集蔡元
福從趙暉進
討兵衆寡數倍他將皆為郭元福極數百騎獨
出令曰敢回頭者斬衆勅死以戰遂有成功
壬申郭
威奏得郭從義報今月十四日鳳翔王景崇兵士離本

城尋遣監軍李彥從率兵襲至法門寺西殺戮二千餘人詔陞河中府解縣為解州冬十月丙子朔山陵使竇貞固上大行皇帝陵名曰睿陵從之丁丑夕歲星入太微戊寅趙暉奏破王景崇賊軍于鳳翔城下甲申吐蕃遣使獻方物丙戌右羽林將軍張播停任坐檢田受請託也丁亥中書舍人張誼責授房州司戶兵部郎中馬承翰責授慶州司戶並員外置所在馳驛發遣先是誼與承翰俱銜命于兩浙覩其驕僭之失形于譏誚兼乘

醉有輕肆之言錢弘俶恥之撫其過以奏之朝廷以方
務懷柔故有是命甲辰延州奏夏州李彝殷先出兵臨
州境欲應接李守貞今卻抽退十一月甲寅誅太子太
傅李崧及其弟司封員外郎嶼國子博士義夷其族為
部曲誣告故也詔曰稔惡圖危難逃天網虧忠負義必
速神誅李崧頃在前朝最居重位略無裨益遂至滅亡
及事契丹又為親密士民俱憤險佞可知先皇帝含垢
掩瑕推恩念舊擢居一品俾列三師不謂潛有包藏謀

危社稷散差人使潛結奸宄附近山陵擬為叛亂按其
所告咸已伏辜宜正典章用懲奸逆其李崧李嶼李義
一家骨肉及同謀作亂人並從極法云庚申大行皇帝
靈駕進發辛酉荆南奏節度高從誨卒壬申葬高祖
皇帝于睿陵十二月丁丑荆南節度副使檢校太傅行
峽州刺史高保融起復授荆南節度使檢校太尉同平
章事渤海郡侯壬午帝被袞冕御崇元殿授六廟寶冊
正使宰臣蘇禹珪使副大府卿劉暉赴西殿行禮兖州

奏淮賊先于沂州界立柵前月十七日已歸海州為李

守貞牽制也

南唐書嗣主六年李守貞遣從事朱元李平奉表來乞師以潤州李金全為西面行

營招撫使壽州鄧彥貞為副諫議大夫查文徽為監軍使兵部侍郎魏岑為沿淮巡撫使閭河中平遠班師又

李金全傳云出師沐陽諸將銳于進取金全獨以為遠不相及乃止 庚寅奉高祖神主于

西京太廟淮南偽主李璟奉書于帝云先因河府李守

貞求援又聞大國沿淮屯軍當國亦于境上防備昨聞

大朝收軍當國尋已徹備其商旅請依舊日通行朝廷

不報辛卯羣臣上表請以三月九日誕聖日為嘉慶節

從之延州節度使高允權奏得都頭李彥李遇等告太子太師致仕劉景巖與鄉軍指揮使高志結集草寇欲取臘辰窺圖州城尋請使臣與指揮使李勳聊將兵士巡檢偵邏劉景巖果出兵鬪敵時即殺敗其劉景巖尋獲斬之詔曰劉景巖年已衰暮身處退閒曾無止足之心輒肆包藏之毒結集徒黨窺伺藩垣所賴上將輸忠三軍協力盡除醜類克殄渠魁其劉景巖次男前德州刺史行琮已行極法長男渭州刺史行謙孫男邢州馬

軍指揮使崇勳特放是冬多昏霧日晏方解

舊五代史卷一百一

舊五代史卷一百一考證

漢隱帝紀上三月二十四日行次永興思綰等作亂突
入府城據城以叛。案歐陽史云四月壬午永興軍
將趙思綰叛附於李守貞據是書趙思綰據城叛在
三月非四月事五代春秋通鑑俱從是書

八月壬午命樞密使郭威赴河中府軍前。案周書周
太祖紀云七月西面師徒大集未果進取其月十三
日制授帝同平章事即遣西征據此紀則周太祖以

七月庚申加同平章事八月壬午命赴河中府軍前
非一時事也二紀前後自相矛盾歐陽史漢周本紀
亦各仍是書之舊未能參考畫一通鑑定從是是漢
紀

舊五代史卷一百一考證

欽定四庫全書薈要卷五千五百三

舊五代史卷一百二

宋門下侍郎參知政事監修國史薛居正等撰

漢書第四

隱帝紀中

乾祐二年春正月乙巳朔制曰朕以渺躬獲纘洪緒念
守器承祧之重懷臨深履薄之憂屬以玄道猶艱王室
多故天降重戾國有大喪奸臣樂禍以圖危羣寇幸災

而伺隙力役未息兵革方殷朕所以嘗膽履水廢飧輟
寐雖居億兆之上不以九五為尊漸冀承平永安遐邇
內則稟太后之慈訓外則仗多士之忠勲股肱叶謀爪
牙宣力西摧三叛撫其背而扼其喉北挫諸蕃斷其臂
而折其脊次則已叩嘯聚淮海猖狂繞聞天接鋒交已
見山摧岸沮寇難少息師徒無虧兼以修奉園陵崇建
宗廟右賢左戚同寅協恭多事之中大禮無闕負荷斯
重哀感良深今以三陽布和四序更始宜申兌澤允答

天休卹獄緩刑赦過宥罪當萬物之莩甲開三面之網
羅順彼發生以召和氣應乾祐二年正月一日昧爽已
前天下見禁罪人除十惡五逆官典犯贓合造毒藥劫
家殺人正身外其餘並放河府李守貞鳳翔王景崇永
興趙思紹等比與國家素無讎釁偶因疑懼遂至叛違
然以彼之生靈朕之赤子久陷孤壘可念非辜易子析
骸填溝委壑為人父母寧不軫傷但以屈已受人先王
厚德包垢含辱列聖美談宜推濟物之恩用廣好生之

道其李守貞等宜令逐處都部署分明曉諭若能翻然
歸順朕即待之如初當保始終享其富貴明申信誓固
無改移其或不順推誠堅欲拒命便可應時攻擊尅日
盪平候收復城池罪止元惡其餘誅誤一切不問重念
征討已來勞役滋甚兵猶在野民未息肩急賦繁徵財
殫力匱矜卹之澤未被于疲羸愁嘆之聲幾盈于道路
即俟邊鋒少弭國患漸除當議優饒冀獲蘇息諸道藩
侯郡守等咸分寄任共體憂勞更宜念彼瘡痍倍加勤

卹究鄉閭之疾苦去州縣之煩苛勸課耕桑省察冤濫
共恢庶政用副憂勞凡百臣寮當體朕意壬子賜前昭
義軍節度使張從恩衣一襲金帶鞍馬綵帛等時有投
無名文字誣告從恩者故特有是賜以安其心乙卯河
府軍前奏今日四日夜賊軍偷斫河西寨捕斬七百餘
級時蜀軍自大散關來援王景崇郭威自將兵赴歧下
將行戒白文珂劉訶等曰賊之驍勇並在城西慎為儆
備既行至華州聞川軍退敗且憂文珂等為賊奔突遂

兼程而迴賊城內偵知郭威西行于正月四日夜遣賊

將王三鐵等

宋史王繼勳傳繼勳有武勇在軍陣常用鐵鞭鐵槩鐵提軍中目為王三鐵

率

驍勇千餘人沿流南行坎岸而登為三道來攻賊軍已入王師砦中劉訶極力拒之短兵既接遂敗之二月丙

子詔諸道州府所征乾祐元年夏秋苗畝上紐征白米稗草已納外並放是日旦黑霧四塞丁丑夕大風乙酉以前房州刺史李筠夫為鴻臚卿戊子前右監門將軍喬達及其兄契丹偽命客省使崇等皆棄市達李守貞

之妹婿也故皆誅之庚寅徐州巡檢使成德欽奏至峒
崑鎮遇淮賊破之殺五百人生擒一百二十人戊戌大
雨霖庚子詔左諫議大夫賈緯等修撰高祖實錄三月
丙辰以北京衙內指揮使劉鈞為汾州防禦使夏四月
丙子以荆南節度行軍司馬武泰軍節度留後王保義
為校檢太尉領武泰軍節度使行軍如故丁丑潁州獻
紫兔白兔是月幽定滄貝深冀等州地震辛巳太白經
天辛丑幸道宮禱雨五月甲辰朔故湖南節度使檢校

太尉兼中書令扶風郡公贈太師馬希聲追封衡陽王
戊申以前邠州節度使安審約為左神武統軍以前洛
京副畱守袁義為右神武統軍乙卯河府軍前奏今月
九日河中節度副使周光遜棄賊河西寨與將士一千
一百三十人來奔己未右監門大將軍許遷上言奉使
至博州博平縣界覩蜾生彌亘數里一夕並化為蝶飛
去辛酉兗鄆齊三州奏蜾生乙丑永興趙思綰遣牙將
劉成詣闕乞降制授趙思綰華州節度畱後檢校太保

以永興城內都指揮使常彥卿為虢州刺史丁卯宋州
奏蝗抱草而死己巳湖南奏蠻寇賀州遣大將軍徐進
率兵援之戰于風陽山下大敗蠻獠斬首五千級六月
癸酉朔日有食之兖州奏捕蝗二萬斛魏博宿三州蝗
抱草而死乙亥潁州獻白鹿戊寅安州節度使楊信奏
亡父光遠蒙賜神道碑鐫勒畢無故中斷詔別令斷石
鐫勒己卯滑濮漕衮淄青齊宿懷相衛博陳等州奏
蝗分命中使致祭于所在川澤山林之神開封府滑曹

等州蝗甚遣使捕之

宋史段思恭傳詔捕蝗詔備祈山川思恭上言赦過宥罪議獄廢刑

苟數訟平元則災害不生望合諸州連決重刑無致淹濫必召和平從之

壬午月犯心星辛

卯迴鶻遣使貢方物丙申改商州乾元縣為乾祐縣隸

京兆府是月邠寧澤潞涇延廊坊晉絳等州早秋七月

辛亥湖南奏析長沙縣東界為龍喜縣從之丙辰樞密

使郭威奏收復河府羅城李守貞退保子城丁巳永興

都部署郭從義奏新除華州畱後趙思綰自今月三日

受華州畱後準詔赴任三移行期仍要鎧甲以給牙兵

及與之竟不遵路至九日夕有部曲曹彥進告思綰欲
于十一日夜與同惡五百人奔南山入蜀是日詰旦再
促上路云俟夜進途臣尋與王峻入城分兵守四門其
趙思綰部下軍各已執帶遂至牙署令趙思綰至則執
之與一行徒黨並處置訖甲子樞密使郭威奏收復河
中府逆賊李守貞自燔而死丙寅以權涼州畱後折逋
嘉施為河西軍節度畱後兗州奏捕蝗三萬斛丁卯前
洺州團練使武漢球卒戊辰永興軍節度使兼兵馬都

部署郭從義加同平章事徙華州節度使郭從義奏處
斬前巡檢使喬守溫供奉官王益時知化任繼勳等守
溫受高祖命巡檢京兆會王益自鳳翔押送趙思綰等
赴闕行至京兆守溫迎益于郊外思綰等突然作亂遂
據其城及郭從義率兵攻討令守溫部署役夫守溫有
愛姬陷在賊城為思綰所錄及收城從義盡得思綰之
婢僕守溫求其愛姬從義雖與之意有所慊遂發前罪
密啓于郭威請除之與王益等併誅焉兗州奏捕蝗四

萬斛壬午西京留臺侍御史趙礪彈奏太子太保王延
太子洗馬張季凝等自去年五月後來每稱請假俱是
不任拜起詔延等宜以本官致仕甲申以陝州節度使
充河中一行兵馬都部署白文珂為西京留守加兼侍
中潞州節度使充河中一行副都署常思加檢校太師
以右散騎常侍盧撰為戶部侍郎致仕辛卯右拾遺高
守瓊上言任官年未三十請不除授縣令詔起今後諸
色選人年及七十者宜注優散官年少未歷資考者不

得注擬縣令癸巳以翰林學士工部尚書張沆為禮部尚書沆卜葬先人以內署無例乞假乃上章請解職以赴葬事遂落職以遣之乙未宣徽南院使永興行營兵馬都監王峻宣徽北院使河府行營兵馬都監吳虔裕並加檢校太傅九月乙巳樞密使郭威檢校太師兼侍中宋州節度使兼侍衛親軍都指揮使史弘肇加兼中書令初郭威平河中迴朝廷議加恩威奏曰臣出兵已來輦轂之下無犬吠之憂俾臣得專一其事軍旅所聚

貨糧不乏此皆居中大臣鎮撫謀畫之功也臣安敢獨擅其美乎帝然之于是弘肇與宰相樞密使三司使次第加恩既而諸大臣以恩之所被皆朝廷親近之臣而宗室劉信及青州劉銖等皆國家元勳必有不平之意且外慮諸侯以朝廷有私于親近也于是議及四方侯伯普加恩焉丙午西京畱守判官時彥澄推官姜蟾少尹崔淑並免居官坐不隨府罷職為畱臺侍御史趙礪所彈也已酉以右千牛上將軍孫漢賚為絳州刺史禮

部尚書判吏部尚書銓事王松停見任坐子仁實為李
守貞從事也尋卒于其第辛亥宰臣竇貞固加守司徒
蘇逢吉加守司空蘇禹珪加左僕射楊邠加右僕射依
前兼樞密使太子太師致仕皇甫立卒癸丑三司使王
章加邑封乙卯鄴都高行周加守太師襄州安審琦加
守太傅兗州府符彥卿加守太保北京劉崇加兼中書
令丁巳澶州李洪信移鎮陝州以侍衛馬軍都指揮使
遂州節度使李洪義為澶州節度使己未許州劉信加

兼侍中開封尹侯益進封魯國公鄆州慕容彥超青州劉
錙並加兼侍中湖南馬希廣奏于八月十八日大破朗州
馬希萼之衆辛酉靈州馮暉夏州李彝殷並加兼中書令
右衛將軍石慤左武衛將軍石訓並停任慤等以八月中
秋享晉五廟命倡婦宿于齋宮鴻臚寺劾之故有是責癸
亥鎮州武行德鳳翔趙暉並加檢校大師鄴都磁相邢洺等
奏霖雨害稼西京奏洛水溢岸乙丑晉州王晏同州張彥
贇邠州侯章涇州史慤滄州王景延州高允權並加檢校太

師冬十月庚午朔契丹入寇是日定州孫方簡徐州劉贊並加
同平章事以利州節度使宋延渥為滑州節度使
甲戌皇弟興元節度使勳加檢校太師丙子相州郭
謹貝州王繼宏邢州薛懷讓並加檢校太尉庚辰
安州楊信鄧州劉重進加檢校太師河陽李暉加
檢校太傅壬午兩浙錢宏俶加守尚書令湖南馬
希廣加守太尉癸未監修國史蘇逢吉史官賈
緯以所撰高祖實錄二十卷上之丙戌荆南高保

融加檢校太師兼侍中以殿前都部署江州防禦使李
建為遂州節度使充侍衛馬軍都指揮使以奉國左廂
都指揮使永州防禦使王殷為夔州節度使充侍衛步
軍都指揮使契丹陷貝州高老鎮南至鄴都北境又西
北至南宮堂陽殺掠吏民數州之地大被其苦藩郡守
將閉關自固遣樞密使郭威率師遣邊仍令宣徽使王
峻叅預軍事庚寅府州折從阮進封岐國公豐州郭勳
進封虢國公十一月壬寅鄜州畱後王饒加檢校太傅

癸丑以吳越國王錢弘俶母吳氏為順德太夫人時議者曰封贈之制婦人有國邑之號死乃有諡后妃公主亦然唐則天女主自我作古乃生有則天之號韋庶人有順聖之號知禮者非之近代梁氏賜張宗爽妻號曰賢懿又改為莊惠今以吳氏為順德皆非古之道也乙卯以大府卿劉皞為宗正卿十二月庚午朔湖南奏靜江軍節度使馬希瞻以今年十月十八日卒廢朝二日辛未日暈三重戊寅司徒門下侍郎平章事實貞固奏

請修晉朝實錄詔史官賈韓竇儼王伸等修撰以禮部
尚書張沆復為翰林學士壬午皇帝二十一姊永寧公
主進封奏國長公主潁州奏破淮賊于安陽

舊五代史卷一百二

舊五代史卷一百二考證

漢隱帝紀中安州節度使楊信○案楊信本名承信在
隱帝時避御名去承字是書仍當時實錄之舊

丁巳永興都部署郭從義奏新除華州畱後趙思綰與
一行徒黨竝處置訖○案歐陽史作郭威殺華州畱
後趙思綰于京兆蓋威命從義圖之耳

甲子樞密使郭威奏收復河中府逆賊李守貞自燔而
死○案通鑑壬戌李守貞自焚死歐陽史作甲子克

河中祇以奏聞之日為據也五代春秋繫於六月殊誤

辛亥宰臣竇貞固加守司徒○案宋史竇貞固傳作隱帝即位加司徒考貞固加司徒在乾祐二年宋史作即位所加蓋未詳考

以利州節度使宋延渥為滑州節度使○案延渥為利州節度使於前未見王禹偁宋公神道碑云少帝嗣統授檢校太尉使持節利州諸軍事行利州刺史蓋

延渥於元年出鎮利州二年復改鎮也是書未及詳載



舊五代史卷一百二考證



總校官編修臣朱 鈐

校對官助教臣李 巖

謄錄監生臣謝 雲

欽定四庫全書薈要

史部

舊五代史卷一百三八

三至

詳校官編修臣王天祿



欽定四庫全書蒼要卷五千五百四

舊五代史卷一百三

宋門下侍郎參知政事兼修國史薛居正等撰

書第五

隱帝紀下

乾祐三年春正月己亥朔帝不受朝賀鳳翔行營都部
署趙暉奏前月二十四日收復鳳翔逆賊王景崇舉族
自燔而死丁未鳳翔節度使充西南行營都部署趙暉加



兼侍中戊申密州刺史王萬敢奏奉詔領兵入海州界
至荻水鎮俘掠焚蕩更請益兵詔前沂州刺史郭瓊率
禁軍赴之庚戌前永興軍節度副使安友規除名流登
州沙門島先是友規權知永興軍府事及趙思綰之
奔衝友規失守城池至是乃正其罪焉癸亥以前邠州
節度使宋彥筠為太子太師致仕丙辰分命使臣赴永
興鳳翔河中收葬用兵已來所在骸骨時已有僧聚髑
髏二十萬矣前沂州刺史郭瓊奏部署兵士深入海州

賊界是月有狐登明德樓王者獲之狐毛長而腹下別

有二足二月辛巳青州奏郭瓊部署兵士自海州迴至

當道甲申樞密使郭威巡邊迴丁亥汝州防禦使劉審

交卒乙未以前安州節度使劉遂凝為左武衛上將軍

以鄜州節度使焦繼勳為左衛上將軍以前永興軍節

度使趙贊為左驍衛上將軍三月己亥徐州部送所獲

淮南都將李暉等三十三人狗于市給衫帽放還本土

是月鄴都留守高行周兗州符彥卿鄆州慕容彥超西

京留守白文珂鎮州武行德安州楊信潞州常思府州
折從阮皆自鎮來朝嘉慶節故也戊午宴羣臣于永福
殿帝初舉樂壬戌鄴都高行周移鎮鄴州兗州符彥卿
移鎮青州並加邑封甲子西京留守白文珂潞州常思
鎮州武行德並進邑封鄴州慕容彥超移鎮兗州夏四
月戊辰朔邢州薛懷讓移鎮同州相州郭謹河陽李暉
並進邑封庚午府州折從阮移鎮鄧州辛未故深州刺
史史萬山贈太傅先是契丹入邊萬山城守郭威遣索

萬進率騎七百屯深州一日契丹數千騎迫州東門萬山父子率兵百餘人襲之契丹偽退十餘里而伏兵發萬山血戰急請救于萬進萬進勒兵不出萬山死之遼史世宗紀天祿三年殺深州刺史史萬山契丹亦解去時論以萬進為罪故加萬山贈典馬壬申華州劉訶移鎮邢州安州楊信移鎮鄜州貝州王令溫移鎮安州並加邑封以鄜州留後王饒為華州節度使以其來朝故也丁丑尚食奉御王紹隱除名流沙門島坐匿軍營女

口也辛巳以宣徽北院使吳虔裕為鄭州防禦使時樞
密使楊邠上章乞解樞機帝命中使諭之曰樞機之職
捨卿用誰忽有此章莫有人離間否虔裕在傍颺言曰樞
密重地難以久處俾後來者迭居相公辭讓是也中使
還具奏帝不悅故有是命壬午以樞密使郭威鄴都
留守依前樞密使詔河北諸州應兵甲錢帛糧草一稟
郭威處分癸未府州永安軍額宜停命降為團練州戊
子翰林學士承旨戶部尚書王仁裕罷職守兵部尚書

左千牛上將軍張瓘卒庚寅以西南面水陸轉運使尚書工部侍郎李穀為陳州刺史左金吾上將軍致仕馬萬卒甲午以前華州節度史安審信為左衛上將軍以前潞州節度使張從恩為右衛上將軍五月戊戌朔帝御崇元殿受朝丙午以皇弟興元節度使勳為開封尹加兼中書令未出閣甲子詔諸道州府差置散從官大府五百人上州三百人下州二百人勒本處團集管係立節級檢校教習以警備州城閏月癸巳京師大風雨

壞營舍吹鄭門扉起十數步而墮拔大木數十震死者
六七人水平地尺餘池隍皆溢是月宮中有怪物投瓦
石擊窓撼扉人不能制六月庚子以國子祭酒田敏為
尚書右丞癸卯太僕卿致仕謝攀卒輟視朝一日鄭州
奏河決原武縣界乙卯司天臺上言鎮星逆行至太微左
掖門外自戊申年八月十二日入太微西垣犯上將屏
星執法勾已往來至己酉年十一月十二日夜方出
左掖門順行自今年正月十日夜復逆行入東垣至左

掖門秋七月庚午河陽奏河漲三丈五尺乙亥滄州奏積雨約一丈二尺安州奏溝河泛溢州城內水深七尺丙子帝御崇元殿授皇太后冊命宰臣蘇逢吉行禮辛巳三司使奏州縣令錄佐官請據戶籍多少量定俸戶縣三千戶已上令月十千主簿八千二千戶以上令月八千主簿五千二千戶以下令月六千主簿四千每戶月出錢五百並以管內中等戶充錄事叅軍判司俸錢視州界令佐取其多者給之其俸戶與免縣司差役從

之八月辛亥以蒙州城隍神為靈感王從湖南請也時
海賊攻州城州人禱于神城得不陷故有是請辛酉給
事中陶穀上言請停五日內殿轉對從之壬戌以兵部
侍郎于德辰為御史中丞邊蔚為兵部侍郎九月辛巳
朗州節度使馬希萼奏請于京師別置邸院不允是時
希萼與其弟湖南節度使希廣方構閱墻之怨故有是
請帝以湖南已有邸務不可更置由是不允仍命降詔
和解焉冬十月己亥帝狩于近郊丙午湖南馬希廣遣

使上章且言荆南淮南廣南三道結構欲分割湖湘乞

聊發兵師以為援助時朝廷方議起軍會內難不果行

丁未兩浙錢弘倣加諸道兵馬元帥戊申彰德軍節度

使郭謹卒癸丑以前同州節度使張彥贇為相州節度

使辛酉月犯心大星十一月甲子朔日有蝕之乙丑永

州唐將軍祠贈太保從湖南請也已巳日南至帝御崇

元殿受朝賀仗衛如式辛未詔侍衛步軍都指揮使王

殷將兵屯澶州丙子誅樞密使楊邠侍衛都指揮使史

弘肇三司使王章夷其族是日平旦甲士數十人由廣政殿出至東廡下害邠等于閣內死于亂刃之下又誅弘肇弟小底軍都虞候弘朗如京使甄彥奇內常侍辛從審楊邠子比部員外郎廷侃右衛將軍廷偉左贊善大夫廷倚王章姪右領衛將軍昊子婿戶部員外郎張昭肅樞密院副承宣郭顥控鶴都虞候高進侍衛都承局荆南金三司都勾官柴訓等分兵收捕邠等家屬及部曲僭從盡戮之少頃樞密承旨聶文進急召宰臣百

察班于崇元殿廷宣曰楊邠史弘肇王章等同謀叛逆
欲危宗社並斬之與卿等同慶班退召諸軍將校至萬
歲殿帝親諭史弘肇等欲謀逆亂之狀且言弘肇等欺
朕年幼專權擅命使汝輩常懷憂恐自此朕自與汝等
為主必無橫憂也諸軍將校拜謝而退召前任節度使
刺史統軍等上殿諭之帝遣軍士守捉宮城諸門比近
日旰朝臣步出宮門而去是日晴霽無雲而昏霧濛濛
有如微雨人情惴恐日將午載楊邠等十餘尸分暴于

南北市是日帝遺腹心費密詔往澶州鄴都令澶州節
度使李洪義誅侍衛步軍都指揮使王殷令鄴都屯駐
護聖左廂都指揮使郭崇奉國左廂都指揮使曹英害
樞密使郭威及宣徽使王峻急詔鄆州高行周青州符
彥卿永興郭從義兗州慕容彥超同州薛懷讓鄭州吳
虔裕陳州李穀等赴闕以宰臣蘇逢吉權知樞密院事
前青州劉銖權知開封府事侍衛馬軍都指揮使李洪
建判侍衛司事內客省使閻晉卿權侍衛馬軍都指揮

使丁丑澶州節度使李洪義受得密詔知事不克乃引

使人見王殷殷與洪義遣本州副使陳光穗賫所受密

詔馳至鄴都

案宋史少帝遣供奉官孟業齎密詔令洪義殺王殷洪義素怯懦慮殷覺遷延不敢

發遽引業見殷殷乃

錮業送密詔于周祖郭威得之即召王峻郭崇曹英及

諸軍將校至牙署視詔兼告楊史諸公冤枉之狀且曰

汝等當奉行詔旨斷予首以報天子自取功名郭崇等

與諸將校前曰此事必非聖意即是李業等竊發假如

此輩便握權柄固得安乎事可陳論何須自棄致千載

之下被此惡名崇等願從公入朝面自洗雪于是將校

等請威入朝以除君側之惡共安天下

案東都事畧漢隱帝遣使害太

祖魏仁浦曰公有大功于朝廷握強兵臨重鎮以讒見疑豈可坐而待斃教以易其語云誅將士以激怒衆心

太祖納其言

翌日郭威以衆南行戊寅鄴兵至澶州庚辰至

滑州節度使宋延渥開門迎降是日詔前開封尹侯益

前鄜州節度使張彥超權侍衛馬軍都指揮使閻晉卿

鄭州防禦使吳虔裕等率禁軍赴澶州守捉辛巳帝之

小豎驚脫自北迴先是帝遣驚脫偵鄴軍所至為游騎

所獲郭威即遣迴因令附奏赴闕之意仍以密奏置驚
脫衣領中帝覽奏即召李業示之聶文進郭允明在傍懼
形于色初議車駕幸澶州及聞鄴兵已至河上乃止帝
大懼私謂宰臣竇貞固等曰昨來之事太草草耳李業
等請帝傾府庫以給諸軍宰相蘇禹珪以為未可業拜
禹珪于帝前曰相公且為官家莫惜府庫遂下令侍衛軍
人給二十緡下軍各給十緡其北來將士亦準此仍遣
北來將士在營子弟各賫家問向北諭之壬午鄴軍至

封丘慕容彥超自鎮馳至帝遂以軍旅之事委之

宋史侯益

傳云周太祖起兵隱帝議出師禦之益獻計曰王者無敵于天下兵不宜輕出况大名成卒家屬盡在京城不如閉關以挫其銳遣其母妻發降以招之可不戰而定慕容彥超以為益衰老作懦夫計沮之彥超謂

帝曰陛下勿憂臣當生致其魁首彥超退見聶文進詢

北來兵數及將校名氏文進告之彥超懼曰大是劇賊

不宜輕耳又遣袁義劉重進王知則等出師以繼前軍

慕容彥超以大軍駐于七里郊掘塹以自衛都下率坊

市出酒食以餉軍癸未車駕勞軍即日還宮翌日慕容

彥超揚言曰官家宮中無事明日再出觀臣破賊甲申
車駕復出幸七里店軍營王師陣于劉子陂與鄴軍相
望太后以帝至晚在外遣中使謂聶文進曰賊軍在近
大須用意文進曰有臣在必不失策縱有一百箇郭威
亦當生擒之耳彥超輕脫先擊北軍郭威命何福進王
彥超李筠等大合騎以乘之彥超退卻死者百餘人于
是軍奪氣稍稍奔于北軍吳虔裕張彥超等相繼而去
慕容彥超以部下十數騎奔兗州是夜帝與宰臣從

官宿于野次侯益焦繼勳潛奔鄴軍乙酉旦帝策馬至

玄化門劉銖在門上問帝左右兵馬何在乃射左右帝

迴與蘇逢吉郭允明詣西北村舍郭允明知事不濟乃

剗刃于帝而崩時年二十蘇逢吉郭允明皆自殺是日

周太祖自迎春門入諸軍大掠烟火四發翌日至晡方定

前滑州節度使白再筠為亂兵所害吏部侍郎張允墜

屋而死周太祖既入京城命有司遷帝梓宮於太平宮

或曰可依魏高貴鄉公故事以公禮葬之周祖曰予顛

沛之中不能護衛至尊以至于此若又貶降人謂我何
于是詔擇日舉哀命前宗正卿劉曄主喪丙戌太后誥
曰高祖皇帝翦亂除兇變家為國救生靈于塗炭創王
業于艱難甫定寰區遽遺弓劍樞密使郭威楊邠侍衛
使史弘肇三司使王章親承顧命輔立少君協力同心
安邦定國旋屬四方多事三叛連衡吳蜀內侵契丹啓
釁蒸黎兇懼宗社玷危郭威授任專征提戈進討躬當
矢石盡掃煙塵外寇盪平中原寧謐復以強敵未殄邊

塞多艱允賴寶臣往臨大鄴疆場有藩籬之固朝廷寬
宵旰之憂不謂兇豎連謀羣小得志密藏鋒刃竊發殿
庭已殺害其忠良方奏聞于少主無辜受戮有口稱冤
而又潛差使臣矯賣宣命謀害樞密使郭威宣徽使王
峻侍衛步軍都指揮使王殷等人知無罪天不助奸今
者郭威王峻澶州節度使李洪義前曹州防禦使何福
進前復州防禦使王彥超前博州刺史李筠北面行營
馬步都指揮使郭崇步軍都指揮使曹英護聖都指揮

使白重贊索萬進田景咸樊愛能李萬全史彥超奉國
都指揮使張鐸王暉胡立弩手指揮使何贇等徑領兵
師來安社稷逆黨皇城使李業內客省使閻晉卿樞密
都承旨聶文進飛龍使後贊翰林茶酒使郭允明等脅
君子大內出戰于近郊及至力窮遂行殺逆寃憤之極
今古未聞今則兇黨既除羣情共悅神器不可以無主
萬機不可以久曠宜擇賢君以安天下河東節度使崇
許州節度使信皆高祖之弟徐州節度使贇開封尹承

勲高祖之男俱列磐維皆居屏翰宜令文武百辟議擇
嗣君以承大統云樞密使郭威以蕭牆變起宗祏無奉
率羣臣候太后請定所立且言開封尹承勲高祖皇帝
之愛子也請立為嗣太后告以承勲羸病日久不能自
舉周太祖與諸將請視承勲起居及視之方信遂議立
高祖從子徐州節度使贇為嗣己丑太后誥曰天未悔
禍喪亂宏多嗣王幼冲羣兇蔽惑構奸謀于造次縱毒
藪于斯須將相大臣連頸受戮股肱良佐無罪見屠行

路咨嗟羣心扼腕則高祖之洪烈將墜于地賴大臣郭
威等激揚忠義拯濟顛危除惡蔓以無遺俾綴旒之不
絕宗祧事重纘繼才難既聞將相之謀復考著龜之兆
天人協贊社稷是依徐州節度使贇稟上聖之資抱中
和之德先皇如子鍾愛特深固可以子育兆民君臨萬
國宜令所司擇日備法駕奉迎卽皇帝位於戲神器至
重天步方艱致理保邦不可以不敬貽謀聽政不可以
不勤允執厥中祇膺景命是日遣前太師馮道等往徐

奉迎周太祖以嗣君未至萬機不可暫曠率羣臣請太
后臨朝誥答曰昨以奸邪構釁亂我邦家勲德効忠剪
除兇慝俯從人欲已立嗣君宗社危而再安紀綱壞而
復振皇帝法駕未至庶事方殷百辟上言請予蒞政宜
允輿議權總萬機止于浹旬即復明辟云按前代故事
太上皇稱誥太皇太后皇太后曰令今云誥有司誤也
以宣徽南院使王峻為樞密使右神武統軍袁義為宣
徽南院使陳州刺史李穀權判三司步軍都指揮使王

殷為侍衛親軍馬步都指揮使護聖左鑲都指揮使郭
從為侍衛馬軍都指揮奉國左鑲都指揮使曹英為侍
衛步軍都指揮使鎮州邢州馳奏契丹寇沼州陷內丘
縣時契丹永康王烏裕率部族兩道入邊內丘城小而
固契丹攻之五日不下敵人傷者甚衆時有官軍五百
在城防戍攻急官軍降於敵屠其城而去

遼史世宗紀
十月自將南

代攻下安平內丘東
鹿等城大獲而還

庚寅樞密使郭威奏左軍巡勘得

飛龍使後贊欵伏與蘇逢吉李業閻晉卿聶文進郭允明

等同謀令散員都虞侯奔德等下手殺害史弘肇等權
開封尹劉銖具伏朋附李業為亂屠害將相家屬其劉
銖等準誥旨處置訖并蘇逢吉郭允明閻晉卿聶文進
首級並梟於南北市其骨肉放棄辛卯河北諸州馳報
契丹深入太后誥曰王室多故邊境未寧內難雖平外
寇仍熾據北面奏報強敵奔衝繼發兵師未聞平殄須
勞上將暫自臨戎宜令樞密使郭威部署大軍早謀掩
擊其軍國庶事權委宰臣竇貞固蘇禹珪樞密使王峻

等商量施行在京馬步兵士委王殷都大提舉十二月

甲午朔郭威領大軍北征丁酉以翰林學士尚書戶部

侍郎知制誥范質為樞密副使

東都事畧周太祖征李守貞每朝廷遣使齎詔

處必軍事皆中機會太祖問誰為此辭使者以范質對

太祖曰宰相器也太祖起兵入京師遽令草太后誥及

議迎湘陰公儀注乃白太后

以質為兵部侍郎樞密副使

陝州李洪信奏馬步都指

揮使聶召奉國指揮使楊德護聖指揮使康審澄等與

節度判官路濟掌書記張洞都押衙楊紹勅等同情謀

叛並殺之惟康審澄夜中放火斬關奔歸京師初朝議

以諸道方鎮皆是勲臣不諳改理其都押衙孔目官令

三司軍將內選才補之藩帥不悅故洪信因朝廷多故

誣奏加害也壬寅湖南上言朗州馬希萼引五谿蠻及

淮南洪州軍來攻當道望量差兵士於淮境牽引乙巳

遣前淄州刺史陳恩讓領軍入淮南界以便宜進取辛

亥遣宰相蘇禹珪及朝臣十員往宋州迎奉嗣君壬子

樞密使郭威次澶州何福進已下及諸軍將士扶擁威

請為天子即日南還威上章于太后言為諸軍所迫班

師庚申威至北郊駐軍於臯門村許州巡檢前申州刺史馬鐸奏節度使劉信自殺壬戌奉太后誥命樞密使侍中郭威監國中外庶事並取監國處分先是樞密使王峻以湘陰公已在宋州慮聞澶州之事左右變生遣

侍衛馬軍指揮使郭崇率七百騎往衛之

東都事畧郭崇傳王峻遣

崇率七百騎拒贊過於睢陽崇曰澶州兵變遣崇來衛乘輿非有他也具言軍情有屬天命已定贊執崇手而泣崇即送

已未太后誥曰比者樞密使郭威志安社稷

贊就館

議立長君以徐州節度使斌贊高祖近親立為漢嗣爰自

藩鎮徵赴京師雖誥命尋行而軍情不附天道在北人

心靡東適當改卜之初俾膺分土之命贊可降授開府

儀同三司檢校太師上柱國封湘陰公食邑三千戶食

實封五百戶明年正月丁卯太后誥奉符寶於監國可

即皇帝位周太祖踐阼奉太后為母遷於西宮上尊號

曰昭聖太后是月十五日周太祖與百寮詣帝殯宮成

服親奠不視朝七日又詔太常定諡曰隱以其年八月

二日復遣前宗正卿劉皞護靈輜備儀仗葬於許州陽

翟縣之頽陵祔神主於高祖之寢宮帝姿貌白皙眉目
疎朗未即位時目多閃掣唾洩不止即位之始遽無此
態及內難將作復如故帝自關西平定之後稍自驕易
然畏憚大臣未至縱恣嘗因乾象差忒宮中或有怪異
召司天監趙延乂訊其休咎延乂對以修德即無患即
遣中使就問延乂曰何者為德延乂勸讀貞觀政要
邇後與聶文進郭允明後贊狎習信其邪說以致於敗
高祖之征鄴城也一旦帝語太祖曰我夜來夢爾為驢

負我升天既捨爾俄變為龍捨我南去是何祥也周太祖撫掌而笑冥符盱蠻豈偶然哉

史臣曰隱帝以尚幼之年嗣新造之業受命之主德非禹湯輔政之臣復非伊呂將欲保延洪之運守不拔之基固不可得也然西摧三叛雖僅滅于撓搶而內稔羣克俄自取于狼狽自古覆宗絕祀之速者未有如帝之甚也噫蓋人謀之弗臧非天命之遽奪也

舊五代史卷一百三

舊五代史卷一百三考證

漢隱帝紀下鳳翔行營都部署趙暉奏前月二十四日
收復鳳翔。○案歐陽史作正月趙暉克鳳翔據是書
則收復鳳翔在二年十二月非三年春事也。歐陽史
蓋誤以告捷之月為收復之月耳。五代春秋作十二
月收復鳳翔。誅王景崇為得其實。

澶州刺史李洪義。○案宋史洪義本名洪威。避周太祖諱。改
護聖左廂都指揮使郭崇。○案東都事畧郭崇初名崇

威避周太祖諱止稱崇

庚辰至滑州節度使宋延渥開門迎降○案歐陽史作
庚辰義成軍節度使宋延渥叛附於郭威與是書同
通鑑作辛巳與是書異

郭允明知事不濟乃刺刃於帝而崩○案通鑑攷異引
劉恕曰允明帝所親信何由弑逆蓋郭威兵殺事成
之日諱之因允明自殺而歸罪耳

丑太后誥曰○案原本作乙丑與五代春秋同今從

通鑑改作己丑

烏裕舊作兀欲今改

舊五代史卷一百三攷證

欽定四庫全書薈要卷五千五百五

舊五代史卷一百四

宋門下侍郎參知政事監修國史薛居正等撰

漢書第六

后妃列傳一

高祖皇后李氏晉陽人也高祖微時嘗牧馬于晉陽別墅因夜入其家劫而取之及高祖領藩鎮累封魏國夫人高祖建義于太原欲行頒賚于軍士以公帑不足議

率井邑助成其事。后聞而諫曰：自晉高祖建義及國家興運，雖出于天意，亦土地人民福力同致耳。未能惠其衆而欲奪其財，非新天子卹隱之理也。今後宮所積宜悉以散之，設使不厚人，無怨言。高祖改容曰：敬聞命矣。遂停斂貸之命。后傾內府以助之。中外聞者無不感悅。

天福十二年冊為皇后。隱帝即位，尊為皇太后。

案以下疑有關

文據通鑑云：隱帝與李業等謀誅楊邠等，議既定，入白太后。太后曰：茲事何可輕發？更宜與宰相議之。業時在旁，曰：先帝嘗言朝廷大事不可謀，及書生懦怯，誤人。太后復以為言。帝怒曰：國家之事非閨門所知。拂衣而出。

又云南北遇于劉子陂帝欲自出勞軍太后曰郭威吾家故舊非死亡切身何以至此但按兵守城飛詔諭之觀其志趣必有辭理則君臣之禮尚全慎勿輕出帝不從

周太祖入京凡國軍大事

皆請后發教令以行之是歲議立徐州節度使贇為帝以迎奉未至周太祖乃率羣臣拜章請后權臨朝聽政后于是稱誥焉及周太祖為六軍推戴上章具述其事且言願事后為慈母后下誥答曰侍中功烈崇高德聲昭著翦除禍亂安定乾坤謳歌有歸歷數攸屬所以軍民推戴億兆同歡老身未終殘年屬茲多難惟以衰朽

託于始終戴省來牋如母見待感念深意涕泗橫流云
仍出戎衣玉帶以賜周太祖周太祖即位上尊號曰德

聖皇太后居于太平宮周顯德元年春薨

案隱帝未立
皇后據是書

張彥成傳云隱帝娶彥成女楊邠傳云隱帝所愛耿夫
人欲立為后邠以為太速夫人卒隱帝欲以后禮葬邠
又止之蓋隱帝在位三年崩時年二十故未及冊立皇
后也又五代會要載漢高祖長女永寧公主降宋延渥
天福十二年四月封至乾祐二
年十二月追封秦國長公主

舊五代史卷一百四